


1658
A. juir



AL FONSE DEL' BENE, par la grace
de Dieu & du S. Siege Apostolique, Euef-
que d'Orleans, Conseiller du Roy en ses
Conseils d'estat & priué : A tous Doyens
Chanoines & Chapitres, Abbez, Prieurs,
Curex, Vicaires, Predicateurs, & autres ec-
clesiastiques, Seculiers & Reguliers, de no-
stre Diocese, Salut. Comme il n'y a rien que le Fils de Dieu
ait tant recommandé à ses Apostres, que la predication de son
euangile: il n'y a rien aussi à quoy leurs successeurs soient plus
étroittement obligez, qu'à en publier les veritez aux peuples
qui leurs sont commis, & à employer tous leurs soins, à ce qu'on
en obserue les loix toutes saintes & toutes diuines. Cette obli-
gation a tousiours esté inseparable de la charge pastorale; mais
elle est à present dautant plus grande & plus pressante, que les
efforts de Satan pour abolir les maximes del'euangile sont plus
violents que iamais, que le mal est plus dangereux, & que la
guerre est plus ouuerte. Cet ennemy qui sembloit auparauant
ne combattre qu'en cachette, & à la faueur de l'Ignorance, ou
de l'infirmité, plustost que de la malice des hommes, attaque
aujourd'huy a découuert les premieres & plus importantes Re-
gles du Christianisme: & ramassant à dessein dans des liures mon-
streux, tout ce qui se peut trouuer d'horrible touchant les mœurs,
s'efforce de changer la loy d'amour, & de sainteté que I E S V S-
C H R I S T nous a laissée, en vne Morale plus détestable, & plus
impie, que ne le fut iamais la plus corrompue des Philosophes
Payens. Entre ces mal-heureux liures, vn entre les autres a pa-

ru depuis quelques mois en ça, en nostre Diocese, si remply de cette mauuaise doctrine, que nous serions coupables deuant Dieu d'une lâche preuarication dans nostre charge, si nous ne nous opposions fortement par la iuste condamnation qu'il merite, aux relâchemens épouuantables, qu'il introduit dans les mœurs. C'est vn liure anonyme intitulé *Apologie pour les Casuistes, contre les calomnies des Iansenistes*, dont l'Auteur enseigne aux Iuges à se laisser corrompre; apprend aux valets à commettre des vols domestiques; permet aux pecheurs de demeurer dans les occasions de leurs cheutes; abandonne les débauchez à leurs sens; & met au nombre des choses indifferentes les excez de bouche les plus brutaux & les plus deraisonnables. Il permet les Simonies, & les vsures; & par vn dangereux artifice, il leur oste seulement leurs noms pour en mieux établir les Crimes. Il traite indignement la Penitence, & pour exempter les libertins des Ieusnes que l'Eglise ordonne, il leur fournit des moyens si honteux & si deshonestes que la pudeur ne nous permet pas de les rapporter, & qu'ils ne peuuent estre ouys sans horreur, des oreilles chastes. Il approuue la calomnie la plus noire, & qui impose de faux crimes à des innocens. Il ouure la porte aux homicides pour des offences pretendues contre l'honneur imaginaire du monde: il veut mesme qu'il soit permis en ces cas, de tuer vn homme qui s'enfuit: Et quelques regles que le Fils de Dieu nous ait prescrites sur ce sujet dans son Euangile, il soustient que c'est la lumiere naturelle de nostre raison, qui doit disposer de la vie des hommes, & ose bien l'élever sur vn tribunal en mesme rang, & avec le mesme pouuoir que celui des Roys & des Princes souverains. Nous aurions eu sujet d'esperer que tant d'exces contre les saintes maximes de la Morale Chrestienne que I E S V S- C H R I S T nous a enseignée; & dont il nous a donné de si puissantes preuues dans sa parole & dans sa vie, feroient assez d'horreur aux personnes, qui ont la moindre teinture du Christianisme, pour se destruire d'eux mesmes: si nous ne connoissons, par vne experience déplorable, quelle est la foiblesse des hommes, & de quelle importance il est pour leur conscience & pour leur salut, d'empescher qu'ils ne recoiuent par la lecture des mauuais liures, les premieres impressions d'une doctrine trop relachée. C'est pourquoy ayans eu aduis que ce pernicieux liure intitulé *Apologie, &c.* auoit esté distribué tant en cette ville, qu'en plusieurs autres lieux de nostre Diocese: pour preuenir le mal qu'il pourroit produire, & nous acquitter de nostre charge, apres l'auoir veu, leu, examiné, & diligem-

3

ment considéré, & l'auoir fait voir & examiner par plusieurs personnes doctes & pieuses: N o v s l'auons condamné & condamnons par ces presentes, comme contenant plusieurs tres-mauuaises & tres-pernicieuses maximes, qui corrompent la discipline & les mœurs, & introduisent un relâchement entierement opposé aux regles de l'E-uangile. Auons fait & faisons tres-expresses inhibitions, & defences à toutes personnes de nostre Diocèse de le lire, vendre, ny debiter, sous peine d'excommunication. Vous enioignons d'instruire les peuples dans les Commandemens de Dieu & de son Eglise, & les conduire respectiuelement chacun à vostre égard, selon les principes de la Religion Chrestienne contraires à ces maximes condamnées, en y obseruant neantmoins toutes les regles de la prudence & de la charité. Et à ce qu'aucun n'en ignore. Nous ordonnons que ces presentes seront leuës & publiées aux Profnes & Predications par trois Dimanches consecutifs, & affichées en la maniere accoustumée. D O N N E' en nostre Synode General tenu à Orleans le Mardy quatrième iour du mois de Iuin l'an 1658.

588

Ainsi signé,

ALFONSE DELBENE Euesque d'Orleans.

Et plus bas,

Par Commandement de Mondit Seigneur
l'Illustrissime & Reuerendissime Euesque
d'Orleans.

B L A N C H E.

Case

Wing

to 110

02

144

.A1

v.1

no.7D

THE NEWBERRY LIBRARY